

Danmarkimi efterskolertarnermut tapiissutit pillugit Namminersorlutik Oqartussat nalunaarutaat

Efterskolit pillugit Inatsisartut inatsisaanni nr. 13, 5. december 2008-meersumi, Inatsisartut inatsisaatigut nr. 17, 3. december 2012-imeersukkut allanngortinneqartumi § 20, imm. 2 naapertorlugu makku aalajangersarneqarput:

Kapitali 1

Tapiissuteqariaatsit sammisallu tapiiffigineqarsinnaasut

§ 1. Ilinniartitaanermut Naalakkersuisoqarfik Danmarkimi efterskolertarnermut atatillugu makkununga tapiissuteqartarpoq:

- 1) Angajoqqaat akiliutaannik appartitsinissamut.
- 2) Ilinniarnertup aallartilerneranut ilinniarunnaarnermullu atasumik Kalaallit Nunaannit utimullu ilinniartup angalaneranut.
- 3) Ilinniartup angalanerminut atasumik pisariaqartumik unnuisariaqarnerinut.
- 4) Ilinniartup angalanerani pisariaqartitsineq naapertorlugu nerisaqarneranut.
- 5) Qanigisat napparsimarulunnerannut toqukkulluunniit qimagunnerannut atasumik Kalaallit Nunaannut utimullu ilinniartup angalanera.
- 6) Ilinniartup napparsimarulunneranut toqukkulluunniit qimagunnerannut angajoqqaatut oqartussaassuseqartup Danmark-imut utimullu angalaneranut.
- 7) Timikkut tarnikkulluunniit innarluutillip taassumalu ikiortaata misissuiartorlutik angalanerannut, taakkununga assersuutigalugu ilaallutik ilaqutaasoq, attaveqaataasoq najugaqaqatigiiffimmeersoq, paaqqinnittarimmeersoq assigisaanniluunniit pisoq, tak. § 2.
- 8) Ilinniartunut immikkut pisariaqartitsisunut ikorsiissutinut, tak. § 3.

Imm. 2. Qanigisatut, tak. imm. 1, nr. 5, paasineqassapput qatanngutit, aapparisaq, qitornat, angajoqqaat aamma aanaa/aataakkut. Immikkut ittumik pisoqartillugu Ilinniartitaanermut Naalakkersuisoqarfiup inuit allat qanigisatut isigineqarnissaat aalajangersinnaavaa.

§ 2. Misissuiartorluni angalanermut tapiissutit, tak. § 1, imm. 1, nr. 7, tunniunneqartarput immikkut efterskolertitsineq sorleq ilinniartup immikkut pisariaqartitaanut tulluarnepaanersoq misissuiffiginissaa siunertaralugu.

Imm. 2. Misissuiartorluni angalanermut ilaassaaq ilaqutariinnut attaveqaataasinnaasunut pulaarnek, ilinniartup efterskolertarnerani suleqatigiinnissamut tunngatillugu ataatsimoorussamik ilimagisaasut qulaajarnissaat siunertaralugu.

Imm. 3. Ilinniarteq timikkut tarnikkulluunniit innarluutilittut paasineqassaaq ilinniarteq inunnut annertuumik innarluutilinnut ikiorsiisarneq pillugu inatsisinut atuuttunut ilaasoq.

§ 3. Ilinniartunut immikkut pisariaqartitsisunut, tak. § 1, imm. 1, nr. 8 ikiorsiissutitut ilaapput ingerlassat ilinniartup immikkut pisariaqartitaanik aallaaveqarlutik ilinniartup iluatsitsisumik efterskolimiinnissaanut tapertaasinnaasut. Ikiorsiissutit suussusissaat annertussusissaallu ilinniartitaanermut Naalakkersuisoqarfimmut qinnuteqartoqareerneratigut akuersissutigineqassapput.

§ 4. Ilinniartitaanermut Naalakkersuisoqarfik aningaasanut inatsimmi aningaasaliissutit aalajangersaasoqarneratigut ilinniartut Københavnimut aanerannut aningaasartuutitut akiliuteqarsinnaavoq, matumani angalaneq naalakkersuisoqarfimmit aaqqissugaasimappat kiisalu efterskolernerup aallartinneranut atatillugu ilitersuineranut piareersarnernullu pikkorissartitsinerut aningaasartuutit.

§ 5. Ilinniartitaanermut Naalakkersuisoqarfik aningaasanut inatsimmi aningaasaliissutitut aalajangersaasoqareerneratigut makkununga aningaasartuuteqarsinnaavoq:

1) Ilinniartut efterskolit ammanerisa avataanni ilaqtariinnit attaveqaataasunit allanilluunniit angajoqqaatut oqartussaassuseqartunit taamaaliornissamut pisinnaatinneqarsimasunit isumagineqarsinnaanngitsut inissinneqarallarnernut.

2) Taamaatinnermi akiliut, tak. § 18, imm. 1, taamaattoorli annerpaamik kr.-it 8000-it.

Imm. 2. Imm. 1 malillugu Naalakkersuisoqarfiup aningaasartuutai kingusinnerusukkat angajoqqaatut oqartussaassusilinnut akiligassanngortinneqassapput.

§ 6. Ilinniartitaanermut Naalakkersuisoqarfiup aningaasaliissutaasut iluanni Danmarkimi efterskolini ilinniartut tamarmik ilinniarnissamik ilitersorneqarnissaannut aningaasartuutit akilissavai.

Kapitali 2

Tapiissutit annertussusaat

Efterskolimiinnerup akilernissaanut tapiissutit

§ 7. Ilinniartitaanermut Naalakkersuisoqarfik Danmarkimi efterskolernerup angajoqqaat akiliutaasa ilanngaaffiginissaannut aningaasarsiat annertussusiat tunngavigalugu tapiissuteqarsinnaapput. Tapiissutit Ilinniartitaanermut Naalakkersuisoqarfimmut qinnuteqareernikkut inunnut ataasiakkaanut tunniunneqassapput.

§ 8. Tapiissutit naatsorsorneranni aningaasarsianut tunngavigineqassapput angajoqqaatut oqartussaassuseqartut ataatsimoorlutik maannakkorpiaq aningaasarsiarisaat, takuuk Procenti aaqqiissutissaq aamma maannakkorpiaq aningaasarsiat pillugit Inatsisartut inatsisaat, taamaattoq takuuk imm. 2-6. Ilinniarteq katissimassappat ilinniartup taassumalu aappaata qinnuteqarnerup nalaani maannakkorpiaq aningaasarsiaat tamarmiusut atorineqassapput.

Imm. 2. Angajoqqaatut oqartussaassuseqartut avissimappata averusersimappataluunniit angajoqqaatut oqartussaassuseqartup meeqqap najugaqarfigisaata maannakkorpiq aningaasarsiai tapiissutip annertussusissaata naatsorsuiffiginissaanut tunngavigineqassapput. Tamanna aamma atuuppoq meeraq angajoqqaarisamini assigiimmik najugaqartarpat.

Imm. 3. Angajoqqaatut oqartussaassuseqartoq ilinniartup najugaqarfigisaa inummik allamik aappaqarsimappat tapiissutip annertussusissaata naatsorsornerani aapparisaq maannakkorpiq aningaasarsiai aningaasarsianut tunngavigineqartumut ilanngullugit naatsorsuunneqassapput, matumani qinnuteqarfissap nalaani ukioq ataaseq sinnerlugu aappariit katissimappata imaluunniit katinnermut assingusumik inooqatigiissimappata.

Imm. 4. Ilinniartuq oqartussaassusilimmik angajoqqaanngippat tapiissutip annertussusissaata naatsorsuiffiginerani aningaasarsiat 0 kr. tunngavigineqassapput.

Imm. 5. Ilinniartup qatanngutai efterskolernerup aallartinnerani 18-it inorlugit ukiullit ataasiakkaarlugit 30.000 kr.-inik aningaasarsianut tunngavigineqartumi ilanngaataasassapput, matumani pineqartut ilinniartuq najugaqatigippassuk. Meeqqamut 18-it inorlugit ukiulimmut ataatsimut, aningaasarsianut tunngavisoq aamma 30.000 kr. -inik appartinneqassaaq, nunami allamiinnerup aallartinnerani meeqqamik najugaqateqartunut, meeraq aapparisaq inooqatigisap meerarippagu, tak. imm. 3.

Imm. 6. Angajoqqaatut oqartussaassuseqartup aningaasarsiai tapiissuteqartarfiup nalaani malunnaatilimmik ikilisimassappata qinnuteqartoqareerneratigut tapiissutip naatsorsuiffigeqqinneqarsinnaapput. Qinnuteqaammut aningaasarsiat ikilisiinanerannut uppersaatit ilanngunneqassapput. Tamatuma kingorna aningaasarsianut tunngavigineqartoq maannakkorpiq qaammammut aningaasarsiarineqartut 12-imik amerlisarlugit nutaamik naatsorsuiffigineqassaaq. Naatsorsueqqinneq tapiissutinik amerlanernik kinguneqassappat aningaasarsiatigut malunnaatilimmik qaffattoqarsimanera pillugu tapiissuteqarfigineqartoq ilinniartitaanermut Naalakkersuisoqarfimmut nalunaartussaataavoq.

§ 9. Ukiumoortumik aningaasanut inatsisini maannakkorpiq aningaasarsiat tapiissutillu akornanni nikingassummut najoqqutassaaq aalajangersarneqassaaq, taamaattoq takuuk imm. 2 aamma 3.

Imm. 2. Ukiumoortumik aningaasanut inatsisini angajoqqaat akiliutaasa appartinnissaannut tapiissuteqarnissamut annerpaaffiliinissaaq aalajangersarneqassaaq.

Imm. 3. Ukiumoortumik aningaasanut inatsisini aningaasarsiakinnernut angajoqqaat akiliutissaannut tamakkiisumik akiliussisoqarsinnaanera aalajangersarneqarpoq.

Angalanerit akilernissaannut, ineqarnermut nerisaqarnermullu tapiissutit

§ 10. Ilinniartup angajoqqaatulluunniit oqartussaassusillip angalaneranut aningaasartuutitut, tak. § 1, imm. 1, nr. 2, 5 aamma 6 tapit tassaapput angallassisutitut tamanut atuuttunut akikinnerpaanut aningaasartuutit tamarmiisut.

Imm. 2. Aqqut alla, imm. 1-imi taaneqarsimanngitsoq, atorlugu angalasoqarsimappat pisortat angallassisinnaanermik akuerisaannut akikinnerpaamut aningaasartuutit killigalugit akiliussisoqassaaq. Aqqummut pisortat angallassisinnaanermik akuerisaannik angallassisinnaaneq periarfissaqanngippat angalanertut akikinnerpaatut periarfissaasumut aningaasartuutit qaffasinnerpaaffigisinnaasaannik akiliussisoqassaaq.

Imm. 3. Timmisartumut bilisit suliarereernerisa kingorna allannguinermi

anigaasartuutaanerujunnartunut anigaasartuutit angajoqqaanit akilerneqassapput, tamanna angajoqqaatut oqartussaassuseqartut angalanermut kissaatinik allannguinerannik pissuteqarpat.

Imm. 4. Angalanermut anigaasartuutit ilinniartunut inunnut annertuumik innarluutilinnut ikiorsiissutit imaluunniit meeqqanut inuusuttunullu ikiorsiissutit pillugit malittarisassat atuuttut naapertorlugit isumaginnittoqarfinniit akilerneqartut imm. 1 aamma 2-mi aalajangersarneqartuni killiliussat iluini utertinneqassapput.

§ 11. Misissuiartorluni angalanernut, tak. § 1, imm. 1, nr. 7, tapiissutit tassaapput Danmarkimut utimullu pulaarfillu akornanni angallassissutitut tamanut atuuttunut akikinnerpaanut anigaasartuutit tamarmiusut, taamaattoq timikkut tarnikkulluunniit innarluutilimmu ingiallortaanullu ataatsimut annerpaamik katillugit 30.000 kr.

Imm. 2. Ilinniartitaanermut Naalakkersuisoqarfiup imm. 1-imi anigaasanut killigitap qaangerneqarnissaa immikkut akuersissutigisinnaavaa, tamanna pissutsinik immikkut ittunik tunngaveqarpat, tamatumunnga ilanngullugu najugaqarfiup sumiiffia pissutigalugu angalaneq immikkut ittunik angalanermut anigaasartuutaalersimappat.

§ 12. Ilinniartup angalanerminut atatillugu pisariaqartumik unnuisariaqarnerinut tapiissutitut anigaasartuutit tamakkiisumik akilerneqassapput, tak. § 1, imm. 1, nr. 3

Imm. 2. Angalaneq ilinniartup pisuussutiginnisaanik allangortariaqalersillugu tassanngaannartumik ineqartitsinissaq pisariaqalissappat, ineqarfissaq anigaasartuuteqarnissarluni inissiineq sioqqullugu Ilinniartitaanermut Naalakkersuisoqarfimmit akuerineqqaassapput.

§ 13. Ilinniartup angalanerminut atatillugu pisariaqartumik nerisaqarnissaanut tapiissutit, tak. § 1, imm. 1, nr. 4 tunniunneqartarput najugaqarfigisami nerinerimut allagartatut.

Imm. 2. Ineqarfigisq nerinerimut allagartanik tigusineq ajorpat, nerisaqarnerimut tapiissutit tunniunneqassapput, angalareernerim anigaasartuutigisimasanut uppersaatinik tunniussisoqarpat nerinerimullu ataatsimut 100 kr. tapiissutaassalluni.

Imm. 3. Angalanerup ingerlanerani ilinniartup pisuussutiginnisaanik allannguisoqarneratigut nerinissaq pisariaqalersimappat, nerisaqarnerimut tapiissuteqartoqassaaq angalareernerim anigaasartuutigisimasanut uppersaatinik tunniussisoqarepat, nerinerimullu ataatsimut 100 kr. tapiissutaassalluni.

Kapitali 3

Tapiiffigineqarnissamut piumasaqaatit

§ 14. Tapiissuteqassappat makkua piumasaqaataapput:

1) Ilinniartoq danskisut innuttaassuseqassaaq.

2) Ilinniartoq aamma ilinniartumut angajoqqaatut oqartussaataasut efterskolimiinnerup aallartinnerani Kalaallit Nunaanni najugaqavissuussapput efterskolimiinnerullu aallartinnera sioqqullugu sivikinnerpaamik ukiumi ataatsimi Kalaallit Nunaanni najugaqavissuusimassallutik. Kalaallit Nunaata avataani najugaqarfiit isumassuiffittut naatsorsuussaassanngillat kalaallit oqartussaasui

najugaqartitsinermut aamma najugaqartitsinermut ilinniagaqarnermuinnaq pissuteqartumut peqataasimatillugit.

3) Ilinniarteq efterskolimiinnerup aallartinnerani ukiuni arfineq-pingasuni atuarsimassaaq imaluunniit 14-inik ukioqalereersimassalluni, 18-inillu ukioqalereersimassanani,

4) Ilinniarteq efterskolimi Danmarkimi ilinniartitaanermut ministerimit akuerisaasumi ilinniartussatut akuerineqarsimassaaq, takuuk § 15. Ilinniarteq angerlarsimaffiup avataanut inissitaq, takuuk § 19, efterskolimi Danmarkimi oqartussaasut meeqqanik inissitanik ilinniartoqarsinnaasutut akuerisaanni ilinnialersinnaanermik akuerisaasimassaaq, takuuk § 15.

5) Ilinniarteq efterskolimiitsilluni Danmarkimi ilaqutariinnut attaveqarfigisassaminut angajoqqaatut oqartussaassuseqartut toqqagaannut attaveqassaaq, takuuk § 16.

6) Ilinniarteq siusinnerusukkut Kalaallit Nunaanni Danmarkimiluunniit efterskolernissanut tapiiffigineqarsimassanngilaq, taamaattoq takukkit imm. 4 aamma 5, imaluunniit paarlaaqatigiilluni ilinniariarnermut tapiiffigineqarsimassanani.

Imm. 2. Ilinniartitaanermut Naalakkersuisoqarfik immikkorluinnaq pisoqarsimatillugu najukkamut piumasaqaat imm. 1, nr. 2-miittoq saneqqussinnaavaat, soorlu assersuutigalugu ilinniarteq angajoqqaatullu oqartussaassuseqartoq ukiuni arlalinni Kalaallit Nunaanni aalajangersimasumik najugaqarsimappata imaluunniit meeraq Kalaallit Nunaanni aalajangersimasumik najugaqarsimappat ukiuni arlaqartuni najugaqareersimappat, taamaalineranilu angajoqqaatut oqartussaassuseqartoq nunami allami aalajangersimasumik najugaqarsimappat.

Imm.3. Ilinniartitaanermut Naalakkersuisoqarfiup immikkut pisoqartillugu ukiuni arfineq-pingasuni atuarsimanissamik piumasaqaat aamma ilinniartup 18-inik ukioqalersimannginnissamik piumasaqaat saneqqussinnaavai, tak. imm. 1 nr. 3, tamatumunnga ilanngullugu ukiut arfineq-pingasut ataallugit atuarsimaneq atuartup klassimik alluisimaneranik pissuteqarpat, ukioqqortuallaarnerlu atuartup klassimik uteqqiisimaneranik allamiluunniit pissuteqarluni atuarnermi kinguaattoorsimaneranik pissuteqarpat.

Imm. 4. Ilinniartitaanermut Naalakkersuisoqarfiup immikkut pisoqartillugu imm. 1, nr. 6-imi siusinnerusukkut tapiiffigineqarsimannginnissamik piumasaqaat saneqqussinnaavaa, tamatumunnga ilanngullugu ilinniarteq nammineq pisuussutiginngisaminik siusinnerusukkut efterskolernermik unitsitsiinnarsimappat imaluunniit naalakkersuisoqarfiup nalilerpagu efterskolernerup nanginnissaa ilinniartup ilinniaqqinnissamut periarfissaqalernissanut pingaaruteqarlunnartoq.

Imm. 5. Ilinniartunut inunnut annertuumik innarluutilinnut ikiorsiisarneq pillugu malittarisassanut ilaasunut, imm. 1, nr. 6 apeqqutaatinngu, ukiut pingasut tikillugit tapiisoqarsinnaavoq.

Imm.6. Ilinniartitaanermut Naalakkersuisoqarfik tapiissutinut tunngatillugu piumasaqaateqarsinnaavoq, taakkununga ilaassalluni ilinniartup ilinnialernermut piareersarnissamullu pikkorissartitsinernut peqataanissaa, takuuk § 4, imaluunniit ilinniarteq efterskolernermut atatillugu immikkut perorsaanerup tungaatigut ikorsiiffigineqarnissaa pisariaqarnersoq, tak. § 3.

§ 15. Efterskolerfimmi akuerisaasumi atualernissaaq allakkatigut efterskolimiit atsiorneqartumik uppernarsarneqassaaq.

§ 16. Angajoqqaatut oqartussaassuseqartut ilaqutariinnik atassuteqarfissanik toqqaasimanerat, tak. § 14, imm. 1, nr. 5, angajoqqaatut oqartussaassuseqartut aamma ilaqutariinnik atassuteqarfigineqartussanit

atsiorneqartumik nalunaaruteqarnikkut uppersarneqarsimassaaq. Akuersissuteqarnermut nalunaarut aalajangersimasooq ilinniartitaanermut Naalakkersuisoqarfimmit suliarineqartoq atorineqassaaq.

§ 17. Ilinniartooq efterskolip aallartinnerani takkutinngitsoorpat tapiissuteqartarneeq unitsinneqassaaq.

Imm. 2. Ilinniartitaanermut Naalakkersuisoqarfup imm. 1 sanioqqussinnaavaa, ilinniartup efterskolip aallartinnerani takkutinngitsoornera pissutsinik immikkut ittunik akuerineqarsinnaasunik pissuteqarsimappat, tamatumunnga ilanngullugu tamanna ilaqutariinni peruluttoqarneranik angallannermiluunniit pissutsinik ilinniartup pisuussutiginnngisaanik pissuteqarpat.

§ 18. Efterskolerneq unitsinneqarpat ullormiit unitsitsiffiusumiit tapiiffigineqarsinnaaneq unissaaq.

Uniinnarnerup kingorna efterskolerfusoq piffissami aalajangersimasumi efterskolimiinnerup akilerneqarnissaanik piumasaqarpat (taamaatinnermi akiliut), tapiiffigineqarnissamik pisinnaatitaaffik piffissami tassani pigiinnarneqassaaq, taamaattorli sivilunerpaamik sapaatip akunnerini sisamani.

Imm. 2. Angerlamut angalanermut aamma pisariaqartumik unnuiffissanut nerisaqarnermullu aningaasartuutinik akiliunneqarsinnaaneq taamaallaat atuutissaaq, ilinniartooq angerlannginnermini Kalaallit Illuutaannit efterskolimut attuumassuteqartumit aaqquissuunneqartumik oqaloqatigineqaaqarsimappat. Oqaloqatigiinnermi qularnaarneqassaaq ajornartorsiutinut uniinnarnermut patsisaasunut aaqquissutaasinnaasut tamarmik misilinneqarsimanissaat, tamakkununga ilanngullugit ilinniartunut ataasiakkaanut ikiorsiissutit, tak. § 1, imm. 1, nr. 8. Oqaloqatigiinneq ilinniartup efterskoliani pissaaq, ilinniartup efterskolernerminik unitsitsiinnarniarluni nalunaaruteqarnerata kinguinnguutigut. Oqaloqatigiinnermut peqataassapput Kalaallit Illuutaanni sulisoq, efterskolimi sulisoq ilinniartorlu, ilinniartorlu 18-it inorlugit ukioqarpat angajoqqaatut oqartussaassuseqartut imaluunniit ilaqutariit ilinniartumut attaveqaataasut peqataassapput.

Kapitali 4

Qinnuteqarnermi periutsit

Ilinniartut annertuumik innarluutillit aamma ilinniartut angerlarsimaffiup avataanut inissinneqarsimasut pillugit immikkut paasisassat

§ 19 Ilinniartunut inunnut annertuumik innarluutilinnut ikiorsiisarneeq pillugu malittarisassanut qaqugukkulluunniit atuuttunut ilaasunut aamma ilinniartunut meeqqanik inuusuttunillu ikiorsiisarneeq pillugu malittarisassat qaqugukkulluunniit atuuttut naapertorlugit angerlarsimaffimmik avataanut inissinneqarsimasunut tapiissutit aatsaat tunniunneqarsinnaapput efterskolernissaq isumaginninnermi oqartussaasunit akuerineqarsimappat.

Ilinniartunut perorsaanikkut immikkut tapersorsorneqarnissamik pisariaqartitsisunut immikkut paasisassat

§ 20. Ilinniartut Danmarkimi efterskolernerminik ingerlatsinissaminut perorsaanikkut immikkut tapersorsorneqarnissamik pisariaqartitsisut aamma ilinniartunut taakkununga angajoqqaatut oqartussaassuseqartut ikiorsiissutinik pisariaqartitsisoqarnersoq qulaajaaffiniarlugit efterskolimi atualernissaq eqqarsaatigalugu ilinniartut atuarfiannit ilitersorneqarnissamik piumasaqarsinnaapput.

Ilinniartunut tamanut tunngatillugu

§ 21. Ilinniartunut § 19-imi pineqanngitsunut tunngatillugu ilinniartup efterskolimi akuerisaasumi atualernissaa pillugu ilinniartumut angajoqqaatut oqartussaassuseqartut qinnuteqassapput.

Imm. 2. Ilinniartup efterskolimi akuerisaasumi ilinniartunngorsinnaaneraniq nalunaarut aamma ilaqutariinnit attaveqaataasartussanit uppersarsaat pigineqalerpata, Namminersorlutik Oqartussanit tapiiffigineqarnissamik qinnuteqaat Ilinniartitaanermut Naalakkersuisoqarfiup immersugassiaa atorlugu immersugaq nassiunneqassaaq.

Imm. 3. Qinnuteqarfissatut immersuiffissaq nittartakkami naalakkersuisoqarfiup innersuussaani nassaarineqarsinnaavoq. Immersuiffissaq immersorneqassaaq naalakkersuisoqarfiullu aqutsisussat toqqagaanut angajoqqaatut oqartussaassuseqartuniit atsiorlugu nassiunneqarluni. Qinnuteqaammut ilanngussatut makku ilanngunneqassapput:

- 1) Efterskolip ilinniartup atualersinnaaneranut neriorsuutaa, takuuk § 15.
- 2) Ilaqutariinnit attaveqaataasunit akuersinnermut nalunaarut immersoriigaq atsioriigarlu, takuuk § 16.
- 3) Inoqutigiinnut najugaqarnermut uppersarsaat qangarnisaanerusoq.
- 4) Kuisinnermut allagartaq imaluunniit angajoqqaatut oqartussaassuseqartut kikkuunerinut allatut uppersarsaat.
- 5) Angajoqqaatut oqartussaassuseqartunut inuup normui maannakkorpiaq aningaasarsiarineqartut pillugit paasissutissanik piniarnermut atugassat. § 8, imm. 3 malillugu qinnuteqartoqarnerani aapparissamut inuup normua paasissutissiissutigineqassaaq.
- 6) Ukiuni arfineq-pingasuni atuarsimanermut uppersarsaatissatut karakterinut uppersarsaat, takuuk § 14, imm. 1, nr. 2.

Imm. 4. Ilinniartoq § 19-imut ilaasimappat ilumut ilinniartoq meeqqanik inuussuttunillu ikiorsiisarneq pillugu malittarisassat atuuttut malillugit angerlarsimaffiup avataanut inissinneqarsimanersooq imaluunniit inunnut annertuumik innarluutilinnut ikiorsiisarneq pillugu malittarisassanut atuuttunut ilaanersooq oqartussaasunit pisinnaatitaasunit eqqortunit uppersarsaat aamma ilanngullugu nassiunneqassaaq.

§ 22. Ilinniartitaanermut Naalakkersuisoqarfik ilinniartup Danmarkimut angalanissaanik aqqissuussimatillugu qinnuteqaat naalakkersuisoqarfimmiit aqutsisussatut toqqakkamit ukiumi efterskolernerup aallartiffissaani marsip 15-ia tikitsinnagu tiguneqareersimassaaq.

Imm. 2. § 2 malillugu misissuiartorluni angalanerit tapiiffiginissaat pillugu qinnuteqaat efterskolernissap aallartinissaa ukiumik ataatsimik sioqqullugu aqutsisussamit naalakkersuisoqarfimmiit toqqakkamit kingusinnerpaamik februaarip aallaqqaataani tiguneqareersimassaaq.

§ 23. Ilinniartitaanermut Naalakkersuisoqarfik efterskolit ilinniartoriligassaannut tapiissutit tunniunneqartut taakkualu tunniunneqarnissaannut periutsit pillugit nalunaaruteqassaaq.

Imm. 2. Ilinniartitaanermut Naalakkersuisoqarfik ilinniartut kikkut Kalaallit Illuutaasa ataasiakkaat Danmarkimiittut qanittuini aallartittussaanerit pillugit nalunaaruteqassaaq.

§ 24. Angajoqqaatut oqartussaassuseqartut ilinniartup efterskolimiinnerminik unitsitsinera, ilinniarfimmut allamut nuunnera paasissutissallu allat tapiissutisiuarnissamut pingaaruteqartut pillugit ilinniartitaanermut Naalakkersuisoqarfimmut nalunaarnissamik pisussaaffeqarput.

Imm. 2. Ilinniartitaanermut Naalakkersuisoqarfik paasissutissanik tapiissutit pillugit qinnuteqaatip naliliiffiginissaanut pisariaqartinneqartunik piniarnissamik piginnaatinneqarpoq, taakkununga ilanngullugit aningaasarsianut tunngatillugu paasissutissat aamma tapiissutit ingerlaannarnissaannut pisinnaatitaaffimmik naliliinissaq. Naalakkersuisoqarfik aningaasarsianut paasissutissanut paasissutissanullu allanut tapiissuteqarsinnaanermut pingaaruteqarsinnaasunut tunngatillugu misiligutissanik tiguisinnaatitaavoq, taakkununga ilanngullugu tapiissutit annertussusissaat.

§ 25. Ilinniartitaanermut Naalakkersuisoqarfik tapiissutit utertinneqarnissaannik piumasaqarsinnaavoq, imaattoqarsimappat:

- 1) angajoqqaatut oqartussaassuseqartut tapiissutininik tunineqarnissamut pissutsinik pingaaruteqarsinnaasunik eqqunngitsunik paasissutissiisimappata imaluunniit allannguutit pillugit nalunaarusussimanngippata,
- 2) tapiissutit eqqunngitsoq tunngavigalugu tunniunneqarsimappata,
- 3) tapiissutit aningaasaliiffigineqartunut atorneqarsimanngippata,
- 4) najugaqarnerup aallartinnissaa inniminnerneqareersoq akilernerneqareersorlu angalanerup kingorna efterskolerneq aallartinneqarsimanngippat, imaluunniit
- 5) ilinniartup efterskolimiinnera ima sivilisutigisimappat efterskolerneq ilumoortumik aallartinneqarsimanani, unitsitsiinnarnerlu naammattumik tunngavilersorneqarsimanngippat.

Angalanerit aqunneqarnerat

§ 26. Ilinniartitaanermut Naalakkersuisoqarfiup ilinniartullu kommunerisaani ingerlatsiviup angajoqqaatut oqartussaassuseqartut isumasiorlugit ilinniartut efterskolimut angalanissaasa piareersarnissaat isumagissavaa, taamaattoq tak. imm. 3 aamma § 28 imm. 1.

Imm. 2. Ilinniartitaanermut Naalakkersuisoqarfiup ilinniartut Danmarkimut tikinneranni isumagineqarnissaat ataqtigiiissassavaa.

Imm. 3. Ilinniartunut angerlarsimaffiup avataanut inissitanut tunngatillugu isumaginninnermi oqartussaasup pisinnaatitaaffeqartup angajoqqaatut oqartussaassuseqartut isumasiorlugit ilinniartut efterskolimut angalanissaasa piareersarnissaat Danmarkimullu tikinneranni isumagineqarnissaat isumagissavaat.

§ 27. Kalaallit Illuutaata inissisimanermigut ilinniartup efterskolianut attuumassuteqartup angajoqqaatut oqartussaassuseqartut isumasioqatigalugit ilinniartup efterskolereerluni angerlamut angalanissaata piareersarnissaa isumagissavaa, taamaattoq tak. imm. 2 aamma § 28 imm. 2.

Imm. 2. Ilinniartunut angerlarsimaffiup avataanut inissitanut tunngatillugu isumaginninnermi oqartussaasup pisinnaatitaaffeqartup angajoqqaatut oqartussaassuseqartut isumasiorlugit ilinniartut efterskolimit angerlarnissaat isumagissavaa.

§ 28. Angajoqqaatut oqartussaassuseqartut ilinniartup efterskoleriarluni angalanissaanut namminneerlutik piareersaarusuttut isumaginnikkusuttullu tamanna pillugu angalanissaq sioqqullugu kingusinnerpaamillu marts-ip 15-iani ilisimatitsissapput.

Imm. 2. Angajoqqaatut oqartussaassuseqartut efterskolimiit ilinniartup angerlarnissaanut angalanissamik piareersaarusuttut isumaginnikkusuttullu tamanna pillugu Kalaallit Illuutaannut kingusinnerpaamillu angerlarnissaq qaammatinik tallimanik sioqqullugu ilisimatitsissapput.

Angalanermut aningaasartuutinik utertitsineq

§ 29. Angajoqqaatut oqartussaassuseqartut efterskolimut efterskolimiillu ilinniartup angalaneramik namminneerlutik aqqissuussisut ilinniartup angerlarnernanut bilitsimut akikinnerpaamut killeqartitamullu utertinneqarsinnaanngitsumullu aningaasartuutaasut uppersarsarneqarsinnaasut ilinniartitaanermut Naalakkersuisoqarfimmit utertinneqarsinnaapput, taakkununga angalanermut atatillugu unnuisariaqarnernut pisariaqartunut aningaasartuutit ilanngullugit. Angerlarsimaffiup Københavnillu akornanni angalanermut aningaasartuutit kiisalu Danmarkimi akikinnerpaamik angallassisunut aningaasartuutit atuartumut immikkut aningaasartuutit naatsorsorneqassapput.

Imm. 2. Bilitsi akikinnerpaq imaluunniit allanngortinneqarsinnaanngitsaq atorineqanngippat, utertoorigineqarsinnaapput ullormi angalaffimmi bilitsip allanngortinneqarsinnaanngitsup akia angalanerulluunniit akikinnerpaap nalinga.

Imm. 3. Angajoqqaat Kalaallit Nunaanni mittarfeqarfimmut qaninnermut namminneerlutik angallassigunik aningaasartuutit namminneq akilissavaat.

Tapiissutit tunniunneqartarnerat

§ 30. Efterskolernerup akilernissaanut tapiissutit, takuuk § 7, efterskolimut pineqartumut qaammatit tamaasa tunniunneqartarput. Tapiissutit aningaasartaat piffissap tapiiffiusup ingerlanerani allanngussappata, takuuk § 8, imm. 6, isertitanut tunngavigineqartup nutaap naatsorsoreernerisa kingorna qaammatip qaangiunneratigut tapiissutit allanngortut tunniunneqassapput.

Imm. 2. Efterskolerneq taamaatiinnarneqarpat tapiissutit tunniunneqartarnerat unitsinneqassaaq, taamaattoq tak. § 18, imm. 1.

Naammagittaalliuuteqarneq

§ 31. Tapiissutitut tunngatillugu aalajangiinerit allaffissornikkut oqartussaasunut allanut naammagittaalliuutigineqarsinnaanngillat.

Kapitali 5

Atuutilersitsinermut atorunnaarsitsinermullu aalajangersakkat

§ 32. Nalunaarut 1. august 2019 atuutilissaaq, ukiorlu atuarfiusoq 2019/2020-miit atortussanngortinneqassalluni.

Imm. 2. Peqatigitillugu Danmarkimi efterskolimiinnermut tapiissuteqartarneq pillugu Namminersorlutik Oqartussat nalunaarutaat nr. 2, 17. januar 2017-imeersoq atorunnaarpoq.

Namminersorlutik Oqartussat, ulloq 4. juli 2019

Ane Lone Bagger

/

Lone Nukaaraq Møller

Namminersorlutik Oqartussat

Imaneq 4

3900 Nuuk

E-mail: nsninatsit@nanoq.gl

Linkit iluaqutaasussat

Kalaallit Nunaanni inatsisinut nalunaarutit

Namminersorlutik Oqartussat inatsisinut toqqorsiviat

Naalakkersuisut